

# UUT'T OLDE VODDEN

Woerj in Vodden op mot letten  
En böven an oew lieste zetten,  
Al heb ie dan nog zovöl wensen  
En umgang ok met heel wat  
mensen  
Oew büren dee köj nooit vegetten!

De buurman das een keerl appart  
Dee lig oew heel noa an ut hart  
Door moj altied met umme goan  
Hee wil veur oew kloor stoan  
En deilt oew vreugde en smart!

De buurvrouw is een heel bes  
mense  
Ze wet völle, van alles kent ze  
Zee wil oew ok met alles helpen  
Oew met eur goedheid överstelpen  
En vevullen al oew wense!

De buurn, dat wet iej heel beslis  
Helpt oew ältied ast neudug is!  
Ut harde maakt ze veur oew week,  
Op de mense in dee hele streek  
Door kuj op an! dat is gewis!

Eur eigen werk loat ze wachten  
Um oew narugheid te vezachten  
Denkt zee um eur eigen neet,  
Hebt altied völle tied besteed  
Um de buurnplicht te betrachten!

Ut is iets moois dee burenplich  
Ze maakt ut veur oew vake lich!  
As zee wat veur oew deene  
Veulden ie oew neet meer allene  
De buurte hef een ech gezich!

In Vodden met zien völle wicken  
Ai der noa vroagt zal ut oe blieken  
Hef n huus tut viefteen buurn  
Ai dee berich mot stuern  
Door kump heel wat bieje kicken!

As ter ene verhuuzen geet  
Dan wet de buren woort op steet!  
Veur dat tan kump de nieje buur  
Mot ze schoonmaken: de schuur  
Ut terrein, en ok de hele keet!

Dat is op zich al hoas een fees  
Ze zingt zich doorbie zowat hees!  
Want onder t schoonmaak werk  
Veult ze bezunder sterk  
De band met te buurn ut mees!

Met ut huus begint ze in de nok  
De haanholten, spoorn en ok  
De hilden en zolders zölt ze keern  
Ok de dele, en ze doot ut geern

Zee bunt ter üren met drok!

Wat keern is zöj wel wetten.  
Toch mow door met opletten!  
Meschien zuut ene twel vekeerd  
Zee hebt twoord soms neet eleerd  
Dat mow effen toch rech zetten.

tIs een simpel woord dat kéern  
Door köj neet völle van leern  
Zit iej der toch met velègen,  
tIs heel gewoon moor: vègen!  
Noew kuj t tan goed veteern.

Dee schoonmaak dee gif zin  
Das veur de buurn een goed begin  
tIs neet um dr ene te vewennen  
Iej leert de buurnplicht kennen!  
En noew könt ze der schone in!  
De buurn búnt ter dan nog neet  
Want zo as ut toor buuten geet  
Zee zölt neet willen falen  
Ze mot um ok nog hálén!  
Zee wet woor ut op steet!

Met boeren-wagens goat ze dan  
Dee dag op tveurge huus tan an.  
Dan bunt ze met een hele trop  
Ze laajt zien hele spul dan op  
tGeet altied volgens tolde plan.

Van dat grote buren-koor,  
De neusten hebt de leiding door,  
In somme streken neumt ze dee  
De noabers, (minstens bunt ter  
dree)  
In Vodden neumt ze t néústen  
moor!

As ut veühuuzen is gebeurd  
Iej hebt ut toch wel us eheurd?  
n Overtreksmeultjen'kump tr dan  
Dat heurt bieje t vaste burenplan  
En dan wod ter neet getreurd!

De buurn dee wod toor dan vezog  
Want een feesjen mot ter toch  
Zo af en toe wel kommen  
Een betjen kosten kan neet  
bommen  
An een fees buj nooit vekoch!

Want ene dee een feesjen gif  
Dee wet dat hee dan blif  
In ánzeen bieje de mensen  
Ze zölt um t beste wensen  
Zo iets is buuten kif!

As buurn zo samen door bunt tan  
Iej wet neet hoé ut soms kan

Ze leert mekare ok nog wat  
Onder t genot van dreuge en nat!  
De buren-band wod ter hechter  
van!

Op tat feesjen van dén niejen  
Danst ze ok in hele riejen  
De jonges met een deerne  
Dat doot ze moor wat geerne  
En dat wod tan vake vriejen!

De olders zeet tat ech wel graag  
In feite steunt ze ut gestaag  
As tvriejen in de buurte blif  
Gif tat de minste kif!  
Leever as met een vrende blaag!

Kots gaf zon jong mien te vestoan:  
Mien va heft met mien mo edoan,  
Das toch wel heel kot bieje!  
Vlak bieje geet t dus bes, dat ziej  
Woorum mot ik tan wieter goan!!

Noa zon fees heurt de nieje buur  
. Dr ech bieje, en op te duur  
Zal hee dan zeker merken  
Ze helpt um bieje al zien werken,  
Dat wet hee noew sekuur!

As zn kind wil trouwen goan  
Zölt de buurn der al weer stoan  
En zee zölt dee jonge welpen  
Dan ok met alles helpen!  
Zo ist altied al e goan!

Een buurman buj veur t lèven  
Iej zölt álles mèb belèven  
Iej bunt ter éne van dén trop  
Dat gaf nooit nog een flop!  
Iej zit ter nooit meer nèven!

En bieje een sterfgeval  
Steet de buurte ok weer pal!  
Zee regelt de begrafenis  
Door geet hoas nooit wat mis  
Dat wet iej van te veuren al!

De buurn goat ok de dood  
ánzeggen  
En familie alles ok uutleggen!  
De neusten stoat ok hier veurán  
Ze wet precies hóe of ut kan  
En ok wat zee mot zegen.

De kiste wod deur buurn e dragen  
En geet tan op een boeren wagen,  
Met tr néus de buurn as érewach  
Wod hee noa t kerkhof tan e brach.  
Das t laatste dan daj zagen.

Ome Jehan.